

欽定大清會典事例

欽定大清會典事例卷九百九十八

都察院

憲綱

諭旨一

諭旨○天聰十年

諭凡有政事背謬及貝勒大臣有驕肆慢上貪酷不法無禮妄行者許都察院直言無隱即所奏涉虛亦不坐罪。僕知情蒙蔽以誤國論如盡心職業秉公矢行三年考滿定加升賞。○崇德元年

諭都察院各官皆朝廷諫諍之臣朕躬如有不親政務忠良失職姦邪得位有罪者錄用有功者降誦等事。

爾等有所見聞。即行規諫。至於諸王貝勒大臣。有曠
廢職掌。耽酒色。好逸樂。取民財物。婦女。或朝會輕慢。
冠服不具。及以不適己意。託病偷安。不朝參入署者。
禮部稽察。若禮部徇情容隱。爾等察奏。或六部斷事
偏謬。及事未審結。誣奏已結者。爾等亦稽察奏聞。凡
人在部控告。未經審結。又赴告於爾衙門者。爾等公
議。應奏者奏。不應奏者逐之。至爾衙門有受賄之弊。
須互相防檢。若以私讎誣劾。定加爾等之罪。其餘所
奏。是者即為允從。非者亦不加罪。並不令爾等與被
劾之人質對。○順治八年

諭。自今以後。凡有奏告之人。在外者。應先於各該管司道府州縣衙門控訴。若司道府州縣官不與審理。應於該管總督巡撫巡按衙門控訴。若總督巡撫巡按不准。或審斷冤枉。再赴都察院衙門擊鼓鳴冤。都察院問果冤枉。應奏聞者。不與奏聞。准赴通政使司衙門具本奏聞。在京有冤枉者。應於五城御史及順天府大宛二縣告理。若御史府縣接狀不准。或審斷不公。再赴都察院衙門通政使司衙門具奏申告。至於六部。其應呈應訴者。照舊例准理。若內外大小衙門。明知枉情。蔽不上聞。許具本至午門前進奏。傳諭之。

後有仍前聲冤告奏者。問以重罪。該部將此諭刊刻告示。廣布通知。○又

諭。近日痘疹甚多。朕避處淨地。凡滿漢蒙古官民有被冤控告者。內而赴各該衙門。外而赴各該地方官告理。此時奏告之人。概行禁止。如有違旨奏告者。按律治罪。如有枉斷負屈迫情訴告者。當赴都察院通政使司衙門。如不准理。亦必俟過此時再行奏告。爾衙門傳與刑部刊刻告示。曉諭滿漢蒙古官民知之。○

九年

諭。設立都察院。原為有益於國家。凡宜言者言之。儻官

員勤惰。政事修廢。遇有宜言之處。徇情不言。被旁人
叅論。雖悔無益。宜謹慎勉勵。欽哉。○又

諭。都察院為朝廷耳目之官。上至諸王。下至諸臣。孰為
忠勤與否。及內外官員之勤惰。政事之修廢。皆令盡
言。如滿漢各官。有賢有否。督撫按各官。有廉有貪。鎮
守駐防各官。有捍禦勤慎者。有擾害地方者。皆令分
別察奏。其推舉銓用與黜革降罰。及內外各衙門條
陳章奏。有從公起見者。有專恣徇私者。皆令明白糾
駁。○十年

諭。朝廷設立言官。原為繩愆糾繆。事關朕躬。尚許直言。

無隱況諸司過失。理當糾舉。其言果當。宜虛心靜聽。即言有未當。止宜分析事理。聽候朕裁。不許私逞報復。至言官論事。亦須明白確指。不得揄拾風影。挾私妄訐。○又

諭。總督管轄數省。巡撫專任一方。得其人則事治民安。非其人則叢姦滋弊。民受其害。如不行考覈。賢否無辨。何以示勸懲。著以順治十一年正月起。爾部會同都察院。矢公矢慎。將各地方總督巡撫。嚴加考覈。分別確議具奏。不許通賄私行蒙蔽徇縱。向來推用督撫。但止舉侍郎布按。嗣後遇有督撫員缺。不拘品級。

務從公會推擇其品行才猷素著者將政蹟事實詳註會推本內毋得聽受鑽營濫舉匪人朕以澄清吏治責令督撫考覈督撫責之部院如推舉不公著都察院科道官指實糾叅○又

諭凡糾拾反坐言官有壞吏治塞言路以後科道糾拾官員照大計一例處分有挾私妄糾者吏部都察院指實叅奏○十一年

諭凡言官務在知無不言言無不實庶使僉壬屏迹中外肅清若緘默苟容顛倒黑白徇私報怨明知姦惡庇護黨類不肯糾叅而誣陷良善驅除異己混淆國

是者。定行重懲。○又

諭。凡事關政治得失。民生休戚。大利大害。應興應革。切實可行者。言官宜悉心條奏。直言無隱。如果能抒誠有裨政事。朕自不靳懋賞。○十二年

諭。凡事關朕躬。何令不信。何政有差。諸王貝勒在事諸臣。曠職之愆。叢弊之處。及內外各司。何害未除。何利未興。言官各據見聞。極言無隱。一切啟迪朕躬。匡弼國政者。所言果是。即與採用。如有未當。必不加罪。毋得浮泛塞責。○十三年

諭。科道為耳目之官。職在發姦剔弊。凡大姦大惡。從未

經人糾劾者。果有見聞。即據實直陳。不許徇私黨比。撫拾塞責。將人已糾參之事。勦襲妄陳。○十八年諭。凡言官建白。每一事著為一疏。不許一疏臚列多款具奏。○康熙十八年

諭。自古設立臺省。原係朝廷耳目之官。上之則匡過陳善。下之則激濁揚清。務求知無不言。言無不盡。乃稱厥職。近見言官徇私好名者。不可勝數。朕自臨御以來。每期言路。諸臣化其偏私。實陳得失。輔登上理。項有以風聞言事請者。試約略論之。如今之章奏已見施行者。雖不明言為風聞。何嘗不是風聞。今若開風

聞之條。使言事者果能奉公無私。知之既確。言之當理。即當敷陳。何必名為風聞。方入告也。僕生事之小人。恃為可以風聞入告。但徇己之好惡。必致擅作威福。以行其私。彼言之者。既無確見。聽之者。安能問其是非。故曰。無稽之言。勿聽。弗詢之謀。勿庸。正所以誠言之。無據。謀之。自專也。況天下之大。臣民之衆。導之以理。曉之以法。待臣下。須寬仁有容。不因細事而即黜之。所以體羣工也。用人則隨才器使。無求全責備之心。蓋以人材有不齊也。若關天下之重。朋黨徇私之情。皆國家可參可言之大事。不但科道而已。有志

之臣民。概可以言之。何在區區風聞之言。能斂戢姦貪之志氣哉。治國家者。在有治人。不患無治法耳。○

又

諭。今將科道兩衙門本章情弊。無益國計民生之處。一一講晰。卿等必有至公之論。但有所見。即直言無隱。即如科道條陳一事。部議准行。又有科道官言其不可者。儻朝更夕改。何以取信於天下。如舉才能一事。人之材具不一。有能理繁者。有操守好者。有練習事務者。自古選賢任能。為治之大道。與論俸不同。其法未嘗不善。即

世祖章皇帝時亦曾行之。偶有徇私作弊之人將不肖寡廉者薦之。因一人而其法遂壞。自朕親政以來如鹽差關差數行更換。以後條陳不知又改幾次也。又如戶部銷算錢糧一事。因督撫所報不合時價。故部議駁回。而科道輒有言者。以為督撫地方大臣斷無虛估價值。肥己行私。凡有銷算皆不應駁查。及部議已經准督撫之銷算。不行更駁。則科道又以督撫冒銷錢糧。如草豆馬匹等項。事事皆有虛冒。部中不行詳查。概徇情面。由此觀之。應駁不應駁。何者為是。兩說俱無定論。是皆大者。餘難悉述。由此觀之。風聞言

事。明末之陋習。此例一開。恐有不肖言官。藉端挾制。罔上行私。顛倒是非。誣害良善等弊。嗣後如有大姦大貪。叅劾得實。朕法在必行。決不姑貸。○二十七年諭。邇來科道官。絕無章奏。條陳乃科道專責。惟在中無私意而已。嗣後如有條陳。著到暢春園面奏。○三十

一年

諭。國家設立言官。職司耳目。一切吏治民生得失利弊。皆宜殫思竭慮。據實直陳。近見滿漢科道官。建白甚少。殊非朕責望言路之意。嗣後應各矢公忠。研求時務。凡有可以裨益國家之事。悉據所見奏聞。以俟採

擇。但不得懷挾私情。紛更定例。勦襲陳言。泛浮塞責。其有真知灼見。應糾劾者。即行叅奏。亦不得暗受囑託。代人報復。苛責細事。希圖傾陷。○三十三年

諭。設立科道官員。特為條奏政事。今觀都御史以至科道條奏者甚少。國家應言之事頗多。嗣後各宜端其心術。以有益國家之事條奏。○三十六年

諭。國家設立都御史科道官。以建白為專責。所以達下情而祛壅蔽。職任至重。使言官果能奉法秉公。實心盡職。則閭閻疾苦。咸得上聞。官吏貪邪。皆可釐剔。故廣開言路。為圖治第一要務。近時言官奏疏寥寥。雖

聞有入告。而深切時政。從實直陳者甚少。此豈委任
言路之初指乎。嗣後凡事關國計民生。及吏治臧否。
但有確見。即應指陳。其所言可行與否。裁酌自在朝
廷。雖言有不當。言官亦不坐罪。自皇子諸王及內外
大小官員。有所為貪虐不法。並交相比附。傾軋黨援。
理應糾舉之事。務必大破情面。據實指叅。毋得畏怯
貴要。瞻徇容隱。即朕躬有失。亦宜進言。朕決不加責。
其有懷挾偏私。藉端傾陷者。朕因言察情。隱微自能
洞悉。凡屬言官。尚各精白乃心。力矢忠諫。以無負朕
殷切責望至意。○三十九年

御製臺省箴。臺省之設。言責斯專。寄以耳目。甯取具員。通明無滯。公正無偏。黨援宜化。畛域宜捐。洞達政體。斯曰能賢。古昔諍臣。風規懍然。訐謏謀論。垂光簡編。朕每覽繹。如鑒在懸。居是官者。表裏方直。精白乃心。充廣其識。國計民生。臧否黜陟。凡所敷陳。敬將悃愾。風霜之任。以懲姦慝。搏擊之威。以儆貪墨。毋撫細務。苟塞言職。毋紛成憲。妄逞胸臆。書思入告。當寧對揚。沽名匪正。營私孔傷。或藏嫌怨。謬為雌黃。受人指囑。尤為不臧。形諸奏牘。有玷皁囊。職司獻替。亟宜審詳。敬爾在公。風紀嚴廊。辭箴用最。誕告聯常。○又

御製御史箴。柱下一星。列曜太紫。其象維何。今也御史。淬勵風裁。檢齊霜紀。下飭官方。上參國是。肅肅柏府。峨峨豸冠。其職清要。簪筆朝端。百司有闕。是繩是彈。民澤或壅。是宣是殫。汝不自克。何以懲墨。汝不自正。何以糾慝。毋畏強禦。毋縱殘賊。庶幾夙夜。邦之司直。昔之法吏。正色臺中。為我耳目。效彼股肱。馳聲簡冊。流美無窮。敬之敬之。罔不克恭。○雍正元年。

諭。朕仰承大統。遵守成憲。首以求言為急。科道諸臣。原為朝廷耳目之官。與朕躬最親。與國家最切。凡有所見。自應竭誠入告。今雖備位臺垣。即將來之公卿大

吏為科道時不能盡言。則日後官至大僚。豈能期爾建白乎。今後各科道每日一人上一密摺。輪流具奏。或二三人同日具奏一摺。一摺止言一事。無論大小事務。皆可據實陳之。即或無事可言。摺內亦必聲明無可言之故。具摺後在外候旨。或召進面見。或令且退。所言果是。朕即施行。或未甚切當。朕亦留中不發。決不令一人知之。儻有徇私挾讎。顯係情弊。巧為瀆奏者。亦不能惑朕之耳目也。密摺不許人參酌。如有漏洩。或同僚中知而言之。則同僚即可據以密聞。朕將兩人之摺。合驗情事。能隱諱推諉乎。至於有能面

折廷諍。或彈劾權要。或更革弊端。不妨仍照舊露章奏聞。朕亦不拒禁。爾諸臣其敬承明諭。各抒忠悃。毋負朕懸轡設鐸之意。○又

諭外任旗員。受該旗都統參領及五旗本王公恣意需索者。許本官據實封章密詳督撫轉奏。儻督撫瞻顧容隱。許本官封章揭都察院轉為密奏。儻不為奏聞。即各御史亦得據揭密奏。務期通達下情。以除積弊。○又

諭兵部驛站關繫重大。嗣後照勘合之外。有多索一夫一馬者。許前途州縣據實揭報都察院糾參。○又

諭

天時亢旱。朕夙夜焦勞。敬謹齋戒。久未得雨。意者用人行政之間。尚有缺失。不能感召天和。以致甘霖未沛。朕欲在廷諸臣。直言得失。猶恐視為具文。概以諛詞頌揚。負朕實心求言之意。今特諭爾諸臣。各具密摺。凡朕所行之事。或有過失。務須盡言無隱。即所行無過。或更有應行事宜。爾等各據己見。陳奏務期盡善。使朕有則改之。無則加勉。方得古大臣責難於君之義。至用人一途。或有未當。爾等務必據實指陳。毋避嫌怨。即朕親信重臣。亦不妨指出。上古君臣。都俞吁咈。至今傳為盛事。爾等若能披肝露膽。極言直陳。

即所奏未盡合宜。朕亦重其人品。儻仍瞻徇依違。浮詞塞責。朕亦薄其為人。此諭出於至誠。爾等各宜副朕實心。不可虛應故事。果有嘉謨嘉猷。得見之政事。將召天和而蘇民困。胥在於此矣。○二年奉

旨。以六科隸都察院。○又奉

旨。凡科道露章。必候朕御門聽政之日進奏。在各部院奏事之後陳奏。○又

諭。諸王貝勒屬下人。係累世效力舊人。或念其先世養之恩。見幼主有過。直言規諫。或因需索不遂。並聽讒佞之言。將效力之人。妄加殘害。藉端送部治罪。則

忠直之輩。人人箝口。而讒佞小人。轉得任意橫行矣。嗣後如此等曾在其先世效力之人。幼主無故尋釁。妄行陷辱。藉端送部治罪者。准其聲明冤抑。或赴宗人府。或赴都察院呈訴。該衙門奏聞詳審。果係冤情。或撥於別旗。或撥於他王門下。若所訴盡誣。加等治罪。○又

諭。外省督撫有懷私背法逞威等事。給事中御史等受其請託賄賂。為之徇隱。經朕聞知。將都察院堂官一併議處。至上彈劾本章。或有畏難之心。亦未可定。將本章封固。止稱叅本。不必聲明姓名事由。○三年

諭。朕為天下臣民之主。一夫不獲。尚廩朕懷。豈可令郡縣司牧。枉受冤抑乎。朕屢降諭旨。令督撫秉公體恤屬官。尚恐有冤抑之人。嗣後道府以下知縣以上各官。有實在冤抑被叅降革者。令赴都察院具呈。確察原叅緣由。覈實具奏。其並無冤抑。實有罪愆。人品不端。才力不及之人。妄行具呈者。亦必重治其罪。○又

諭昔

聖祖仁皇帝。明目達聰。無微不照。而關繫國計民生之事。尤殷採訪。屢降

諭旨。令內外臣工。各抒所見。不時條奏。無非欲洞悉下

情興利剔弊以期治臻上理也在廷諸臣不能仰體
聖懷往往挾私自利未見有剴切敷陳裨益政事者如
科道等官之章奏或請開例捐納或請開設礦廠或
請節省錢糧種種假公濟私之處不可枚舉皆在
聖祖仁皇帝洞鑒之中故近年來條奏之事

聖心裁擇其可行者見之施行其不可行者概置弗用
而言官之不得遂其私者反有

聖祖仁皇帝不甚納諫之妄議此等小人情狀朕在藩
邸知之甚悉疾之甚深故臨御以來諄諄誥誡期其
各矢公忠直陳無隱夫條奏者原欲上以匡君下以

澤民。非為臣子沽名之具也。朕原有旨。即密奏中。朕不行者。若有真知灼見。力懇施行。仍准其露章陳奏。非必止於密奏也。因念諸臣之欲進言者。或有所顧忌。或有恐招怨尤。或有牽制之情。或有不便顯言之處。故令各人密封進呈。其中言有可採。招怨結冤者。朕將摺內職名裁去發出。或令諸臣會議。或即見諸施行。而外間不知何人所奏。其所以如此者。無非欲人人盡其所言。無所瞻顧迴避。而朕得收聽言之實效。於治理大有裨益之意也。乃有詐偽之人。見其所奏既行。而誇耀於人者。亦有因裁去銜名。無可稽考。

竟將他人陳奏之事。而據為己有者。亦有謂出之自朕。託言諸臣。而實非諸臣之條奏者。種種浮言。深可痛恨。現今已發之條奏正多。諸臣不妨自己直認某事係我所奏。儻目今不肯明言。日後私相誇耀。或攘人之名。以為己有。或貪天之功。以為己利。朕則不能聽其肆行巧詐。而置之不問也。又常見人文集中有擬稿未上之奏疏。夫既有此疏。何以未上。既云未上。何故存稿。此乃欺罔之徒。內懷詐偽。外託忠誠。遇事不敢直言。故飾虛詞。傳播人口。以欺世盜名。無恥之甚。且更有以特恩施行之事。而冒為己功者。如蠲免

蘇松浮糧一事。係戶部所奏。恩自朕出。並無一員條陳。近聞有人自稱為彼之密奏者。人而無恥。至於此極。朕念為政之道。首在得人。故自即位以來。於文武大小臣工。皆留意簡選。而於伊等。陞見之日。必召入面詢。親加訓誨。欲其潔己奉公。勤修職業。謹守法度。愛養兵民。往往丁寧詰誡。至再至三。無非諭及內外事務。及勉勵官方之語。而諸臣出外。每每任意增減。多方粉飾。以誇示於衆。竟有與原降諭旨。甚不相符者。此皆大有關繫。著凡文武官員。曾經面奉諭旨。除不能記載者。俱將訓旨。一一詳細。將年月日。一同繕

寫進呈。内外文武大臣。著自行封進。其不應摺奏之員。著封固。交與該上司轉奏。自今以後。凡面奉諭旨者。亦俱著繕寫進呈。若不繕寫進呈。但私相傳播。及私自記載者。即係假捏旨意。定當從重治罪。○又

諭。滿漢科道。凡有關内外朝政吏治。每人各條奏一摺。封固進呈。若有二三事者。一事用一摺。限兩日內彙齊繳上。不可互相通知訪問。亦不可商之親友。各據己見奏聞。○四年

諭。御史謝濟世。特叅河南巡撫田文鏡貪贓壞法等款。以田文鏡之秉公持正。實心辦事。乃天下督撫中所

罕見者。貪贓壞法之事。朕可以保其必無。而謝濟世於天下。督撫中獨叅田文鏡。朕不知其何心。從前

聖祖仁皇帝見科道官員朋比作姦。互結黨與。潛通聲氣。網利徇情。私賣本章。嚇詐財賄。薦舉悉出於請求。叅劾多由於囑託。至於請開捐納。請開礦廠。種種情弊。不可枚舉。及至敗露之後。則藉口風聞言事。未曾確訪。以此解免其罪。此等惡習。深可痛恨。是以

皇考屢降諭旨切責。至再至三。並停止風聞言事。朕即位以來。因初理政務。惟恐未能周知。是以令滿漢文武諸臣及科道等官。皆用密摺奏事。蓋欲明目達聰。

盡去壅蔽以收實效也。乃科道等官所密陳者。未見有裨益政治之事。而科臣崔致遠等挾私妄奏。不遵國憲。朕是以停止科道之密摺。令其專用本章。而猶恐其惡習尚存。頽風不改。是以諄諄訓誡。往復周詳。誠以科道乃朝廷耳目之官。關係甚重。欲正人心。端風俗。必自科道始。科道無私。方能彈劾人之有私者。若自恃為言官。可以白簡從事。而胸懷詭詐。聽人指使。顛倒是非。擾亂國政。此等之人。實大有害於人心。世道。為國法之所斷不可容。朕豈不知誅戮諫官。史書所戒。然審其緩急。權其輕重。誅戮諫官之過小。而

釀成人心世道之害大也。古人云。禮義不愆。何恤於人言。朕為天下主。豈惜此區區之小節。而忘經國之遠圖哉。謝濟世身為御史。不聞別有建白。而獨將巡撫中秉公持正之田文鏡。加以貪贓壞法之名。特疏糾叅。且自稱風聞言事。顯悖

聖祖仁皇帝之諭旨。而於欽差大臣審定之事。盡欲翻案。並將各案始末情由。及田文鏡之納賄徇情諸事。委曲描寫。若伊在旁目睹者。則其受人囑託。聽人指使。欲傾陷田文鏡。以快其報復。不問可知矣。若不嚴加訊問。則如鬼如蜮之伎倆。得行於光天化日之下。

人心何由而正。風俗何由而端乎。著將謝濟世革職。令大學士九卿詹事科道等嚴訊。務將其中實情審出。不得稍有含糊。儻九卿詹事科道中有謂言官不應加刑者。亦即據實陳奏。不得面從而退。有後言。謝濟世由翰林揀選補授御史。著將揀選之翰林院掌院交部察議具奏。○又

諭。科道乃朝廷耳目之官。所關甚大。果能秉公持正。據實敷陳。方合天下之公。是公非。而於朝廷政事有所裨益。昨日謝濟世叅劾田文鏡貪贓壞法之事。爾等滿漢大小臣工。今日俱在朕前。朕特面加詢問。爾等

若知田文鏡果有劣迹。謝濟世所叅不誣。可即出班陳奏。僕心知田文鏡居官貪婪。此時不行陳奏。而退有後言。則大有虧於臣節。尚可以為人乎。朕既歷問再四。而滿漢大小諸臣。衆口同聲。僉云田文鏡並無貪婪之事。謝濟世所叅各款。事事皆虛。可見公道在人。難於掩蔽矣。夫身為言官。背公懷私。朋比結黨。將造作並無實據之浮言。轉相買囑。慫恿糾彈。以洩私忿。而報宿怨。今無知狂悖之人。愚弄指使。借風聞言事之名。以酬報私恩小惠。則顛倒是非。擾亂國政。其有害於人心風俗者不淺。我

聖祖仁皇帝神明天縱。深知其弊。屢頒

諭旨。屢加訓誡。停止風聞言事。蓋以人君圖治。固貴於
明目達聰。而無稽之言勿聽。弗詢之謀勿庸。則訪聞
不確者。尚不可採。而況於徇私構黨。彼此傾陷。此等
風習。豈可長哉。朕即位以來。所用。在廷大臣。外省督
撫。皆出於至公。並無平素熟識之人。惟年羹堯。傅鼐
係藩邸舊屬。而此二人罪惡敗露。朕即按律置之於
法。未嘗稍加寬貸。至田文鏡者。朕在藩邸時。不但
不識其面。並不知其姓名。因雍正元年年羹堯來京。陛
見時。言山西年歲歉收。皇上宜早為賑恤。朕因降旨。

與巡撫德音令其查奏。及德音回奏稱山西去年收成甚好。道途亦無飢民。實無可賑濟之處。朕以德音身為巡撫。所言如此。年羹堯之陳奏。或有未確。時田文鏡適告祭華山。回京復命。將山西通省荒歉情形。激切敷陳。備極周詳。朕以田文鏡係告祭之員。經過山西地方。閭閻疾苦。並無責任。乃目擊民瘼。直言無隱。深屬可嘉。若非忠國愛民之人。何能如此。因遂命田文鏡往山西任賑濟之事。田文鏡到彼。盡心竭力。辦理甚妥。即以田文鏡為山西布政使。令其與諾岷料理山西一應未清案件。二人秉公和衷。將積年虧

空。及地方宿弊。剔除清理。吏治整頓一新。嗣因河南諸事廢弛。巡撫石文焯不能任怨任勞。實心辦理。故將田文鏡調為河南布政使。令其協理。旋以石文焯調任陝西。即以田文鏡為河南巡撫。朕之所以擢用田文鏡之原委如此。即此乃田文鏡在朕前營求諂媚之事也。及為巡撫之後。三年以來。整飭河工。隄岸堅固。河汎安瀾。年歲豐稔。紳衿畏法。正己率屬。地方甯謐。而每事秉公。潔己謝絕私交。實為巡撫中之第一。李紱自廣西來京。陛見時。即奏田文鏡叅劾黃振國。汪誠邵言綸。甚為冤抑。張球居官聲名甚劣。田文

鏡並不糾叅。且言黃振國此時已為田文鏡監斃。滅口。未幾黃振國已從河南解赴來京。依然無恙。朕不知李紱受何人意指。而捏造此不稽之言。敢於冒昧陳奏也。至田文鏡所叅黃振國各案。皆係田文鏡自行奏請。特遣大臣前往審理。朕因差侍郎海壽史貽直到豫。將各案重審。皆已究訊明白。定擬具奏。其張球一案。田文鏡已經認過請罪。部議亦於張球諱盜案內。已將田文鏡處分矣。夫督撫統轄通省地方。甚廣。屬員甚衆。其居心辦事。安能盡保其無過。田文鏡始而誤信張球為可用。既而察知其不肖。即深自愧。

悔據實叅奏。亦可以解其從前誤用之愆。若必追究已往。藉端苛責。則督撫大吏。將何道而始能免於指摘乎。即如朕之誤用年羹堯。隆科多。始見其可用。則委任之。既覺其姦回。則法治之一。皆本乎大中至正之心。準乎公是公非之理。豈得加朕以誤用匪人之名乎。至汪誠邵言。綸即令田文鏡叅劾。或有未當。亦屬偶然之事。况汪誠邵言。綸皆係庸劣不堪之人。田文鏡叅處。並無冤抑。乃謝濟世於九卿議覆。欽差所審各案。進本之前一日。特叅田文鏡貪贓壞法各款。其中所言黃振國張球邵言。綸汪誠等事。與從前李

紱自廣西來京。陛見時所奏。一一昭合。朕思封疆大
臣。能為朝廷實心任事。即為國之棟梁。朕之股肱。若
不為保護。而任人傾陷。則朕何顏對天下封疆大臣
乎。況從前特頒諭旨。言天下巡撫中實心任事。不避
嫌怨。為國為民者。惟田文鏡、李衛、楊文乾三人。今謝
濟世聽人指使。將田文鏡糾參。顯與朕之明旨相悖。
且田文鏡並不可謂之權要。亦斷不能加以貪汙之
名。而謝濟世為此叅奏者。其意不過欲使天下督撫
皆因循苟且。庸碌偷安。邀衆人之虛譽。保一己之身
家。而不為國家實心效力。以快其黨錮之私心。此種

結黨營私排擠傾陷之惡習。不可不嚴加懲治。是以
令內閣九卿等公同研究。務得實情。將謝濟世正法。
以為言官不法之戒。昨日有人密奏朕云。看謝濟世
乃邊遠無知愚蠢鹵莽亡命小人。而敢以無理之事
妄陳者。其中必有大姦大詐之輩。暗中指使。動以直
言敢諫之美譽。使激皇上之怒。皇上必秉公執法。置
之重典。令皇上有殺言官之名。其心術甚為狡獪。皇
上既洞悉其姦。此時若行嚴究。何情不得。況案內必
牽連多人。而謝濟世斷不肯供出實在指使之。人且
使姦詐之徒。反謂得計等語。朕是其奏。暫寬此一事。

令內閣九卿等審問謝濟世時。將伊所奏田文鏡各款。逐一究訊。謝濟世皆茫無憑據。俯首無詞。則其受人指使。情弊顯然。李紱前任廣西巡撫。謝濟世係廣西人。自供曾於本省晉接。又於京師相見。則平日二人原有往來。未必不因李紱有私惠於彼。而欲借此酬報之也。謝濟世既自命為報效國家之人。著革職。令往阿爾泰軍前效力贖罪。此案亦免深究。如李紱蔡珽等設有暗中指使之事。聞朕此諭。不知可自知愧悔與否。前朕曾降諭旨。凡天下官員有被上司叅劾冤抑者。許令赴都察院控訴。若黃振國汪誠邵言。

綸關敵被叅情由。果有冤抑。何不遵旨。赴都察院辯理。乃黃振國汪誠邵言。綸暗結黨援。搖唇鼓舌。將本身所犯之罪。巧為掩飾。布散浮言。錯營李紱密奏朕前。今又指使謝濟世挺身陳奏。關敵以行賄被劾。乃不安本分。囑託佟鎮寄信隆科多。在朕前稱揚其善。以圖倣幸。在黃振國挾勢婪贓。狂妄不法。已罹重罪。而汪誠邵言。綸關敵等處分。不過罷官。何至要結黨與。請託權要。必欲更翻前案。報復私讎。姦險至此。實為法所難容。是以將黃振國汪誠置之重典。邵言綸關敵俱令發遣邊衛充軍。正如謝濟世奏內所云。如

此則中州士庶罔不歡欣而百爾臣工咸知儆戒矣。半月以前朕面諭九卿翰詹科道戒以構黨營私徇情請託言之可謂諄切矣。乃今有無理妄奏如謝濟世者與朕前旨顯為悖謬。可見此風一時難於悛改。而朕之所以姑寬謝濟世者蓋以不教而殺實所不忍。教而不久朕亦不忍即加誅也。爾等諸臣皆由科甲出身將來為督撫為學政果能公忠體國朕必當加恩保護斷不使萋斐之人得以行其傾陷之計。儻懷私挾詐顛倒是非朕亦決不姑貸。凡此構黨排陷之風朕必加整頓者乃正所以為爾等諸臣之身家

子孫保全久遠之計。若諸臣果能遵朕訓旨。凡事秉公持正。合乎公是。公非。則上下一心。君臣合德。永享昇平之福。豈不美歟。諸臣當共勉之。○又

諭

朕自臨御以來。凡文武大小官員進見時。必諄諄訓誨。諭以國計民生之要務。至於近日。廷臣科道等官。輪班條奏。其實在可行者。即降旨施行。其似有可採者。即發令查議。其有言之未當者。或局於一偏之見。或失之迂闊難行。甚至懷挾私心。不顧大體。敷陳鄙瑣。識見庸愚。朕多召令入見。面加訓誨。剖晰其說。諭以不可施行之故。蓋朕意欲使其人曉然明白。自知

識見之淺鄙。是以降旨之時。周詳往復。不憚煩勞。儻其人退而錄記。果能深會朕心。詳繹朕旨。一一記載。略無舛錯遺漏。豈不甚善。但其事有甚難者。彼於倉猝之際。敬畏矜持。或則錯會朕旨。或則記憶不全。又或書寫之間。詞不達意。或有意捏成。顛倒朕諭。所謂差之毫釐。謬以千里者。正復不少。即如啟奏折本時。大學士及學士滿漢多人。皆每日進見。素常熟習者。而面奉諭旨。退而繕寫進呈。尚且未能悉協。何況出於一人一時之奏對者乎。前者科道翰林八九十人。同奉面諭。朕令其各書呈覽。乃諸臣多寫參差。八九

十員。人皆互異。且與朕旨多不相符。可見理會記載之難矣。設或漫自記錄。謬相流傳。有失降旨之本意。則所關匪細。從前屢經曉諭。曾命在廷大臣與外省文武官弁等面奉之旨。皆書寫進呈。朕覽以防訛錯。今再行申飭。凡內外大小臣工。不論從前嗣後。儻有欲記面奉之旨者。將所記呈奏。方許存錄。儻有未經奏覽。私自存錄者。一經查出。照詐偽制書之律治罪。著各部院衙門將此諭旨錄貼堂壁。俾現任及接任官員共知之。其各省文武官弁等。著該督撫提鎮將朕此旨每年通行曉諭一次。儻屬員等有不知此旨。

者。朕惟該上司是問。○又

諭。朕自即位以來。思念

皇考付託之重。惟恐天下之人。有一夫一婦不獲其所。自朝至夜。殫心竭慮。晷刻靡甯。無非欲休養民生。澄清吏治。使中外永享昇平之福。以仰慰我

聖祖仁皇帝在

天之靈。即如前歲雨澤偶愆。去歲畿輔被潦。朕在宮中虔禱

上天。叩首至於傷腫。中夜屢起。瞻望雲色。以卜晴雨。祈禱之時。嘗終日飲膳不御。不止減膳而已。此皆朕默

盡其心不肯令人知之。在朕心以為敬。

天勤民勵精圖治之意。至真至切。可以自保無少愧歉於中。故凡下詔求言之事。未曾舉行。今夏二麥登場之時。適值連雨。目前雨雖暫晴。尚未開霽。朕為小民深切軫念。且姦民郭允進私貼謠歌。有軍民怨新主之語。朕心因此反躬自省。不能無疑。或用人行政之閒。在朕已實盡其心。而衆人觀論。尚有以為未當之處。亦未可知。總之千萬人中。有一二人或有異議。朕心即欲省察而權衡之。爾內閣九卿翰詹科道等官。皆朕簡用之員。職在匡襄。誼同休戚。若朕身有過。可

直言無隱。政治得失。亦即各抒己見。據實陳奏。朕必嘉納。毋視為具文。毋有所瞻顧。苟且塞責。重負朕真切清問之至意。○七年

諭。自古明目達聰之道。欲以周知庶務。博採羣情。其責端在於臣工之襄贊。然必公正居心。斯能以忠言讜論。裨益政治。苟或植黨營私。辯言亂政。此倡彼和。顛倒是非。實國家之罪人。為王章所不宥。嘗觀前明季世。一二新進後生。竊居言路。遂朋比固結。挾制大臣。把持國政。以致國是日非。而不可挽。此其炯鑒也。我

世祖章皇帝

聖祖仁皇帝聖神御極大觀在上言路宏開羣邪屏息一切猖狂澆薄之風早已翕然丕變雖有不肖之徒亦無能施其伎倆矣朕即位以來以公聽並觀為務以納忠廣益為先既命滿漢文武大臣密陳政務又命科道等於露章之外准其密摺奏事蓋以國家事務殷繁人情弊端種種諸臣有陳奏之心或有不便顯言之處故令密封進呈所以免其瞻顧去其嫌疑俾得各抒所見盡言無隱庶國計民生均有攸賴又如國家任事出力勤慎素著之大臣所辦公務既多豈能保其無所錯誤若因此而被指摘殊非情理其

他偶罹過愆。或其子弟家人生事。失於覺察。一經彈劾。若朕不加處分。則近於護庇。若加以處分。則彼之宣力甚多。而不能恕其一眚。朕心實為不忍。不若言事者密陳朕前。待朕為之斟酌輕重。訓誨區處。亦兩全之道。凡此皆須出於至公至當。方有裨益於風俗人心。非使不肖言官藉密奏以自便其私也。乃營私植黨之徒。竟欲以此逞其姦黠。如崔致遠等不肯為都察院堂官管轄。遂邀約同官密行告訐。狂妄恣肆。詆毀大臣。思欲喪亂國政。此風斷不可長。朕是以降旨停止科道官之密奏。止令各用露章。蓋以其在大

廷廣衆之間。自不敢挾私心而昧公道也。乃復有結黨營私之謝濟世。阿附李紱。蔡珽等。叅劾田文鏡貪贓納賄。公然紊亂黑白。顛倒是非。又如汪浩之請改選法。輒欲輕變舊章。錢廷獻之條奏本省命案等件。擅作威福於鄉里。其餘則撫拾陳言。苟且塞責。又或相率而為依違緘默之計。竟未見一人一事。實有所建白裨益於國計民生者。夫以朝廷耳目之官。視國家之政治如陌路。而又欲以進諫之美譽歸之於己。以不能納諫之名歸之於君上。忍心害理。莫此為甚。人臣事君之義。固可存此等狡詐之心乎。自古以來。

言官以進言為職。豈容以國家之事。沽一己之名。朕之廣開言路者。實欲以衆人之耳目。為朕之耳目。使民隱得聞。萬事就理。並非邀虛懷受諫之名。博建輶置鐸之頌也。乃向來科道官密奏之弊如此。近來露章之習又如此。此中外所共知共見者。奚待朕之指示宣諭耶。然朕之再行訓飭者。誠以言官有補闕拾遺之職。切望其痛改頽風。洗滌故習。盡謹言獻替之道。成蕩平正直之風。如此則科道不愧諫議之官。國家得收納言之效。豈不美歟。儻復蹈昔年之故轍。則有害而無益也。○又

諭。科道乃朝廷耳目之官。專以進言為職。朕令其於露章之外。復行密奏者。蓋欲其時進讜言。匡朕不逮。有益於吏治民生也。既係密奏。則當謹慎。不謀於人。不洩於外。方無忝於事君之義。而不愧言官之任。嗣後儻有密奏之事。朕未將本人姓名發出。而本人自行露洩。或私自存稿者。一經發覺。朕必嚴究。重治其罪。

○十年

諭。文武大臣科道等官。向有輪班條奏之例。近年以來。軍務殷繁。暫時停止。今恐耳目或有未周。下情或有壅於上達者。著仍照前例輪班條奏。○十三年九月

諭。帝王御宇。必周知庶務。洞悉民依。方能措置咸宜。敷施悉協。是以明目達聰。廣咨博採。俾上無不知之隱。下無不達之情。乃治平天下之要道也。我

皇考聖明天縱。生知安行。智周道濟。昭晰靡遺。然猶虛衷延訪。公聽並觀。時令在廷臣工。條奏事件。凡有敷陳當理。裨益庶政者。立見施行。並加獎敘。十三年以來。政治澄清。蕩平正直。貽天下萬世以久安長治之庥。蓋所取於集思廣益者。非淺鮮也。以朕藐躬。何敢上擬

皇考盛德於萬一。且自幼讀書宮中。從未聞外事。耳目

未及之處甚多。允宜恪遵。

皇考開誠布公之舊典。令在京滿漢文武諸臣。仍照舊例輪班條奏。其各抒所見。深籌國計民生之要務。詳酌人心風俗之攸宜。毋欺毋隱。小心慎密。不得互相商榷。及私為指授。如此則朕採擇有資。既可為萬幾之助。而條奏之人。其識見心胸。朕亦可見其大略矣。

○十一月

諭往者

聖祖仁皇帝特製臺省之箴。以重言責。

皇考世宗憲皇帝諭旨。亦諄諄及之。洵以耳目之司。乃

國是所由彰。官常所由肅也。朕以藐躬。繼承丕緒。一日萬幾。常恐措置失宜。以負

皇考付託之重。繩愆糾謬。正爾諸臣。得自竭其忠誠之會也。中外大臣。或有詭法行私。及昏庸不能任職者。近者實蹟有徵。遠者輿論不協。皆宜據實彈劾。以廣朕之聰明。而近觀諸臣所奏。大率毛舉細故。無關體要。朕以實心求言。而專司言責者。仍以虛言塞責。無乃內負夙心。而外慚清議乎。其各自砥礪。凡有關於國政民依者。知無不言。無或畏憚。若仍以不急之務。漫充奏牘。或其人已自敗露。而後捃拾其非。又安用

此至於懷私挾怨受人指囑互相攻訐乃

皇祖之箴所謂尤為不臧者有或蹈此乃自貽伊戚也
勉之慎之。又

諭朕御極之初一時見聞未徧恐不能周知天下之庶
務欲開言路以期集思廣益爰遵

皇考時舊例令滿漢文武大臣官員科道等輪班條奏
使各抒己見用備採擇茲者條奏已將一周其中固
有通達治體可以見諸施行之事而胸無確見真知
因迫於班次已屆勉強湊合支贅成篇者亦復不少
自今一輪之後不必拘定班次僅有所見隨時陳奏

此朕切望廷臣嘉謨入告。實有裨於政治之意。並非
奏牘繁多。厭於披覽也。

[illegible]

欽定大清會典事例卷九百九十九

都察院

憲綱

諭旨二

乾隆元年

諭國家設科道官。原以發抒忠悃。隨時獻替。為專職而進諫之道。莫大乎繩愆糾謬。上佐君德。其規切用人行政。指陳吏治。民生者。次之。此古名臣之所以志在格君。而嘉猷碩畫。有造於國。是民依也。朕近敬閱世祖章皇帝實錄。見當時言官奏疏。尚有骨鯁蹇諤之風。竟能直指君德之得失。而不顧一己利害之私。朕

輒改容誦之。以為我朝人物挺生。忠良之佐。匪躬之節。未嘗遠遜古人也。朕御極以來。求言之詔屢下。而司諫之臣。從未聞有忠言。謹論可藉以為啟沃之助者。計其封章條奏。不過撫拾細事。苟且塞責而已。即欲求其切中政體。痛斥官方之言。尚不可得。何論上及朕躬。塞違昭德。以盡納誨之實乎。夫朕之一身。豈無缺失。正賴廷臣直言。以裒不逮。即云大德不踰。而日理萬幾。或發號施令之失其宜。或慶賞刑威之過其則。或進退黜陟之乖其分。或輕重緩急之爽其衡。皆朕所不能自信者。乃朕誠心求之。而諸臣不能以

誠心應之。則諸臣不能辭曠職之咎也。繼自今。大臣暨科道等。務以古處自期。各矢忠藎。為上為德。為下為民。悉盡言無隱。以修臣職。以繼芳蹤。毋使先正氣骨。獨自擅美於前。庶稱朕拳拳冀望之心。至本朝定鼎以來。從前臣工章疏。有忠諫剴切。卓然可傳者。著內閣翰林院。委官精選。進呈刊刻。以垂示將來。俾後進奉為模楷。其入選章疏。諸臣內有素行端純。完名全節者。准入祀賢良祠。用昭朕崇禮直臣。風勵百僚之意。○又

諭。朕即位以來。屢下求言之詔。至再至三。出於誠切。並

非尚納諫之虛文。誠以朕躬闕失。無由自知。必賴直言匡正。而隨時納誨者。乃臣子之大義。胸有所見。即當直陳。使言之果當。朕當即改易。可收轉圜之益。言之不當。朕亦得以己意明白剖示。釋其疑心。亦開誠布公之道也。惟是公私之辨。不可不嚴。儻有藉直諫之名。以自行其私。妄冀惑亂朕聽。亦斷不能逃朕之洞鑒也。○又奉

旨。嗣後儻有被步軍統領衙門番役等騙害者。准本人赴刑部都察院控告。該部院即據實奏聞。朕必將番役嚴審治罪。不少寬貸。○又

諭人臣陳奏事件。理宜慎密。若有叅劾。既非露章而用密摺。尤不當漏洩於外。以自作威福。前給事中曹一士糾叅王士俊用密摺封奏。朕念君不密則失臣之義。未嘗向一人諭及。乃數日之後。外間已共相傳播。若非曹一士自向人言。則衆人何從而知之。似此輕浮躁妄。自取過愆。深負朕求言之意。著交該部察議。以為密奏而漏言之戒。此正所以教勉諸臣。而非以阻塞言路也。可一併曉諭知之。○又

諭朕自繼序以來。勤思治理。廣開言路。俾大小臣工。皆得密封摺奏。蓋深慮民隱或壅。庶事失理。故公聽並

觀以求濟於實用。諸臣必宅心虛公。見理明徹。慮事周詳。各抒忠悃。實有切於國政。民依。官方利弊。然後可以佐朕不逮。故凡言有裨益。立見施行。而邇來諸臣所奏。或有不能適合。厥中徒有陳奏之名。而不計及實有裨於政治與否。或瑣屑而昧於大體。或空言而無補於國事。非朕求言之本意也。故前降諭旨。諄諄訓迪。其中尤可詫怪者。謝濟世請用其自註學庸。易朱子章句。頒行天下。獨不自揣己與朱子分量相隔如雲泥。而肆口詆毀。狂悖已極。且謂明代以同鄉同姓尊崇朱子之書。則直如襲下老婢。陳說古事。雖

鄉里小兒亦將聞而失笑也。李微欲以孝經與四書並列為五。立義支離。屬辭鄙淺。於宋元大儒所論孝經源流離合。曾未寓目。即欲變亂歷代論定。列於學宮。數百年不易之舊章。亦不自量之甚矣。至於在任守制。事本不可常行。考之禮記。諸侯既葬。王政入於國。大夫士既葬。公政入於家。故戴德喪服變除。言古者壓降之服。其居處飲食哭泣思慕。一如其常期。蓋禮有以權而制者。苟能自盡居喪之實心。亦可無憾也。今薄海奏請。勒令從前在任守制者。雖喪期既滿。仍令解任追服。朕令羣臣守制者。原以行於將來。非

以論其已往。且時過事遠。而勒令衰經三年。於傳所謂喪事。即遠之義。亦未有當。至於配饗孔廟。千秋禮教所關。典至鉅也。兩漢傳經之儒。久升孔廡。後代復議絀之者。且數數然也。陳世倌乃連舉數人。無乃輕率。至若準噶爾侵擾藩屬部落。我

聖祖為邊疆久遠之計。設兵彈壓。本非有耀武窮荒之意。

皇考念我軍屯戍日久。彼國亦甚困敝。故遣使宣諭。減撤戍兵。休養士馬。皆因時制宜。以撫綏中外。陳世倌請修方略。意涉逢迎。如謂調兵籌餉之屬。可為後式。

則各部具有冊籍。何用別為一書。凡此類皆無當於實用。而有關於國體。夫此數人者。皆與論所推服為讀書人。而久不見用者也。今朕拔而用之。而數人之識見若此。陳奏若此。豈不有愧於士林之清議。與朕特擢之恩乎。朕若因其妄行。漬奏。交部議處。不為無名。但朕志切求言。諸臣言雖不當。不惟從寬免其譴訶。亦並不介意。然不得明白訓示者。恐無知之徒。爭相效尤。肆言無忌。天下無識者之聽聞。志慮未免為所惑亂。則所關於世道人心者。匪淺鮮也。故使言者自省。而聞者知戒。各務竭忠效誠。指事當物。以副

朕諄切求言之本意。○二年

諭。國家設立科道。專司建言之責。必心本無私。又能通達治理。乃為無忝厥職。若識見雖未明通。而居心樸誠。則言雖愚戇。尚無害於事理。朕亦鑒其忱悃。而優容之。惟胸懷愛憎之私。藉奏章以展其巧詐者。則有玷臺垣。國法不可以輕恕。即如並未深悉地方民情。而奏稱某地某事甚善。而承辦之人。已暗受其推薦。奏稱某地某事不善。而承辦之人。已暗受其中傷。是其敷陳之時。並未據實秉公。匡襄政務。而言在於此。意注於彼。其居心尚可問乎。近見科道中此等習氣。

頗不能免。亦難逃朕之洞鑒。科道官捫心自問。如稍有愛憎之私。未泯於中者。各宜猛省。悛改。毋蹈罪戾。

○又

諭。從來言官陋習相沿。多由迎合。若人主意在綜覈。率刻意吹毛求疵。巧避瞻徇之迹。而置君德於不問。若人主意在樂聞己過。則又往往於朝廷之政事。吏治之得失。不一言及。甚有臣工不能靖共。羣僚或植黨援。曾不敢一指摘。以遠嫌避害。惟是撫拾陳言。以自沽能。正君心之名。是其居心之陰巧。乃國家之大蠹也。朕孜孜求治。常恐不及。使偶有闕失。言官果能切

實指陳。朕自樂於聽受。即大臣中或有過者。果能據實彈劾。亦足為用人鑒戒。若徒勦襲膚辭。則史冊具在。盡足披覽。何用伊等喋喋陳奏乎。儻錯會朕意。轉生畏憚之念。則又不知朕推誠布公之心者也。○又諭。日來廷臣奏事甚稀。科道官亦少所建白。得無謂天久不雨。朕心憂惻。恐重以煩朕。以是為愛君耶。陽愆陰伏。正宜君臣交儆。恐懼修省。勤思治道。不敢少自暇逸。以仰邀

天鑒。若以是為愛君。非朕所樂受。亦非古賢臣所以愛君之道也。總理事務處及九卿八旗所有應辦應奏

諸務各當悉心體國。日夜孜孜。科道官於民生之疾苦。時政之得失。尤當直陳不諱。俾朕得察納善言。釐清庶務。以踐畏。

天憫民之實事。儻因循緘默。懈事廢時。不獨非愛君之道。且將重朕不德。豈朕之所望於諸臣。亦豈爾諸臣厚於自待之道歟。其咸喻朕意毋忽。○又

諭朕在潛邸。六經諸史。皆嘗誦讀。自承大統。敎筵萬幾。稍有餘閒。未嘗不稽經讀禮。今祥練既邇。畢誼所奏。令諸臣日繕經史奏議。理得施行。在朕廣挹羣言。可以因事鑒觀。隨時觸發。而覽諸臣所進。亦可考驗其

學識。或召見議論。則性資心術。必因此可覘。但畢諱
所奏止及史臣。而朕意科道職司獻替。應令一體錄
呈。其規條應如何酌定。並分日按班呈奏事宜。著總
理事務王大臣定議具奏。欽此。續經王大臣覆奏。奉
旨依議。每日繕進書摺。朕披閱後。交南書房收存。其或
召見講論。朕所降旨。令本人於次日繕寫呈覽。亦交
南書房收存。將來行之日久。不特集思廣益。亦可薈
萃成書。以資觀覽。○三年

諭。朕令科道條陳事件。原許各陳所見。以裨政治。雖所
陳奏不能盡合機宜。且往往有揣摩朕意。有心迎合。

者。此等固不足採。但伊等職司言路。條陳既多。其中豈無可行之事。朕敕交九卿會議。爾等自宜虛公斟酌。不可稍有偏執。○又

諭人君宅中出治。建極綏民。自有千古不易之理。萬年一定之經。以為敷政甯人之本。至於政務之日陳於前。亦惟物來順應。初無成見成心。若豫立意見於事先。則寬嚴賞罰之間。必有不得其平者矣。人臣事君於事之是非可否。一當以禮為準。若存揣摩迎合之念。妄希有當上意。而不顧事理當然之則。則偏陂輕重之弊。不可勝數矣。數年以來。朕屢以此訓戒臣工。

而無如積習已深。猝難變化。即如朕於當寬之事。降一寬恤之旨。而諸臣遂以為朕意在寬。凡所辦理所條奏之事。悉趨於寬之一路矣。朕於當嚴之事。降一嚴厲之旨。而諸臣遂以為朕意在嚴。凡所辦理所條奏之事。悉趨於嚴之一路矣。且有今日之號令甫頒。而明日之摹擬旋至。一人未改面貌。兩事迥異先後。人心不古。何至於茲。夫朕本無心。而臣工視為有意。朕以公心出之。而臣工以私心測之。所謂差之毫釐。謬以千里。豈朕之所望於諸臣者哉。即朕已經降旨施行之事。儻有幾微未協。猶當據理直陳。不難收回。

成命如此方不愧獻可替否之義。朕自嘉獎重待之。豈可徇流俗之見。懷觀望之心。揣摩意旨。以為容悅。而適為朕之所輕鄙哉。用是再頒諭旨。願內外諸臣。各矢惓忱。屏除舊習。以贊成國家蕩平正直之治。特諭。○五年

諭。今年春閒雨澤尚屬調勻。自四月以來。漸覺愆期。昨雖得微雨。仍未霑足。若再遲至旬日之後。便成旱象。二麥收成。必至有減分數。著禮部虔誠祈禱。朕因近日少雨。宵旰焦勞。無時或釋。屢向大學士等咨詢。籌畫感召。

天和惠濟閭閻之道。今日特召爾九卿等面降諭旨。朕之念切憂勤。無非為百姓起見。蓋以百姓皆朕之赤子也。君臣一體。朕之赤子。獨非諸大臣之赤子乎。儻或年歲歉收。朕與諸大臣官員。豈至有飢餒之患。而百姓饔飧不給。嗷嗷待哺。是猶為父母者。晏然飽餐。而聽其子之啼飢於側。於心忍乎。此數日中得邀

上天慈恩。甘霖大霈。自可仍望豐收。設或竟成亢旱。則當豫為未雨綢繆之計。凡可以裨益閭閻者。爾等悉心籌議。及時料理。庶幾有備無患。朕御極五年以來。畿輔之地。雨暘不能時若。上年秋成稍覺豐稔。今歲

春初頻得時雨。朕心方為慶慰。不意目下又有旱象。朕於用人行政之間。返躬自省。仰承

上天眷顧之隆。

皇考付託之重。兢兢業業。不敢有負。此朕心可以自信者。然一日萬幾。不敢信為一無闕失也。即大學士等預參機務。隨朕辦事。又豈能保其無一過愆。人苦不自知。見人之過易。見己之過難。如鏡之能照物。而不能自照也。爾等現居九卿之列。皆為朕之股肱。儻政事或有失於寬縱。及失於嚴刻之處。爾等宜平心細想。有應入告者。或聯銜具奏。或各抒所見。據實直陳。

務期於國計民生。實有裨益。儻摭拾虛詞。以用人行政。為無可置議。或探索瑣事。苟且塞責。皆非朕所諄諄期望於爾等者。夫朋友之間。尚有規勸之義。況我君臣誼關一體者乎。至科道為朝廷耳目之官。朕廣開言路。獎勵多方。並令翰林院郎中參領等官。皆得建言。原冀有裨國是。乃數年中。條奏雖多。非猥瑣陋見。即剽襲陳言。求其見諸施行。能收實效者。何事乎。近日即科道官敷奏者。亦屬寥寥。即間有條奏。多無可採。即如官福參奏工部一事。有意苛求。皆係空中樓閣。毫無實據。朕不准行。降旨申飭。如此者。謂之不

開言路可乎。部院奏事。近日亦覺簡少。或因朕躬欠
安之後。尚須調養。有意減省。遲延耶。雖現在事務未
至貽誤。然如此存心。乃婦寺之忠愛。非人臣事君之
大義也。若因朕此旨。又復陳奏一二無關緊要之事。
以見供職維勤者。又毫無見識者矣。即如各部司官
中。頗有年力老邁。不能辦事之員。該堂官多以無甚
過失。姑為優容。不知此輩久占員缺。凡行取知縣及
額外候補人員。才具可用者。轉致壅滯無缺。可補應
將現任司員老邁者。甄別沙汰。令其休致。此等素餐
之人。仍得原品回籍。亦非過刻之舉。此即各部所應

辦之事也。總之我君臣皆當以實心行實事。刻刻以民生為念。不得稍有粉飾。視為具文。乃可上感

天和。下裨庶政。爾諸臣當交相勸勉。以仰副朕意。並將此旨傳與科道翰林等俾共知之。○又

諭朕命翰林科道諸臣。每日進呈經史講義。原欲探聖人之精蘊。為致治甯人之本。道統學術。無所不該。亦無往不貫。而兩年來諸臣條舉經史。各就所見為說。未有將宋儒性理諸書。切實敷陳。與先儒相表裏者。蓋近來留心詞章之學者。尚不乏人。而究心理學者。蓋鮮。即諸臣亦有於講章中系以箴銘者。古人鑑盤

几杖有箴有銘。其文也。即其道也。今則以詞藻相尚。不過為應制之具。是歧道與文而二之矣。總因居恒肄業。未曾於宋儒之書。沈潛往復。體之身心。以求聖賢之道。故其見於議論。止於如此。夫治統原於道統。學而不正。則道不明。有宋周程張朱諸子。於天人性命大本大原之所在。與夫用功節目之詳。得孔孟之心傳。而於理欲公私義利之界。辨之至明。循之則為君子。悖之則為小人。為國家者。由之則治。失之則亂。實有裨於化民成俗。修己治人之要。所謂入聖之階梯。求道之塗轍也。學者精察而力行之。則蘊之為德。

行。學皆實學。行之為事業。治皆實功。此宋儒之書。所以有功後學。不可不講明而切究之也。今之說經者。聞或援引漢唐箋疏之說。夫典章制度。漢儒有所傳述。考據固不可廢。而經術之精微。必得宋儒參考而闡發之。然後聖人之微言大義。如揭日月而行也。惟是講學之人。有誠有偽。誠者不可多得。而偽者託於道德性命之說。欺世盜名。適啟標榜門戶之害。此朕所深知。亦朕所深惡。然不可以偽託者之獲罪於名教。遂置理學於不事。此何異於因噎而廢食乎。蓋為己為人之分。自孔子時早已明辨而切戒之。學者正

當特擇審處存誠去偽毋蹈徇外驚名之陋習崇正學則可以得醇儒正人心厚風俗培養國家之元氣所繫綦重非徒口耳之勤近功小補之術也朕願諸臣研精宋儒之書以上溯六經之間奧涵泳從容優游漸漬知為灼知得為實得明體達用以為啟沃之資治心修身以端教化之本將國家收端人正士之用而先儒性命道德之旨有功於世道人心者顯著於國家天下朕於諸臣重有望焉○七年

諭朕令翰林科道輪進經史講解以闡發經義考訂史學也而年來諸臣所進往往借經史以牽引時事或

進獻詩賦。與經史本題無涉。甚失朕降旨之本意。即
如今日翰林周長發進呈禮記講章。內稱皇上詣齋
宮齋宿。審定郊祀樂章。禮明樂備。千載一時。宜其誠
敬感格。未郊之先。瑞雪屢降。齋祀之際。風日晴和。太
禮既成。宜付史官等語。夫

郊

廟禮樂乃

皇祖

皇考久定之成規。朕不過略加參定。並非創為制作也。
至於

郊祀之時。風日晴和。亦適逢其會耳。况江南淮徐現被水災。朕方憂勞。微惕宵旰。不遑。豈肯聽受諛詞。而遂以為瑞應乎。周長發著嚴飭行。並將此旨傳諭翰林科道等知之。○又

諭。朕御極以來。廣開言路。凡臣工條奏。有當於事理者。無不見諸施行。其在可行可止之間者。則發交部議。外廷皆共知之。至於陳奏錯誤乖舛。必不可行者。往往姑容留中未發。又或所言近是。而尚須緩酌者。或有陳奏之件。出於淺識曲見。朕明知其無益。即敕交該部。亦必不議行者。或有勦襲規勉之陳言。而不達

事情無補政治者如此等類俱在留中之內。此朕略陳奏之是非。寓隱揚之深意。正以導之使言。惟恐伊等有所顧忌而甘於緘默也。乃近日御史中有謂一切條奏皆不應留中者。一人所奏如此。衆人未必不存此見。竟似朕不樂聞諫。將應施行之事。故為中寢。此則不知朕意之甚者矣。特頒此旨。曉諭言路諸臣知之。○八年

諭御史胡定叅劾許容誣叅謝濟世一案。今據侍郎阿里衮逐一審明。胡定所叅俱實。此案朕特命孫嘉淦前往湖南會同許容虛公查審。倉德又復揭報張燦

等致札換詳等弊。亦交孫嘉淦審理。乃孫嘉淦一概
蒙混具題。經侍郎阿里衮研審。始得實情。朕思胡定
身為言官。若言事不實。自有應得處分。今既實矣。若
止為謝濟世辨白冤抑。其事尚小。因此察出督撫等
之挾私誣陷。徇隱扶同。使人人知所做戒。此則有裨
於政治。為益良多。胡定著交部議敘。至於各省督撫
身任封疆。必舉劾悉秉公心。方不負朕之委任。若以
愛憎為舉劾。如許容孫嘉淦之居心行事。豈不抱愧
大廷。負慚夙夜。各督撫等當深自儆省。以許容孫嘉
淦為炯戒。○又

諭本日御史沈懋華進呈經史講義。朕方將召見訓諭。伊已散去。科道等官輪班進呈經史。數月不過一次。安知朕不召見。竟不候旨而去。殊非人臣敬爾在公之道。著該部嚴察議奏。○又奉

旨。嗣後有交部發議事件。科道不待部覆。參差具奏者。該部於議覆本內。將伊等意見參差之處。聲明請旨。

○九年

諭上年御史沈廷芳條奏行營事件。顛倒謬妄。金溶陳奏孫嘉淦袒護師門。二人身居言路。顯挾私心。不得不加處分。以示懲儆。是以降旨分別降革。諒伊等此

時亦自知愧悔矣。朕以廣開言路為心。於諸言官。甯可待之以寬。沈廷芳。金溶。俱著復還原官。遇缺補用。以觀後效。○十年

諭。朕覽御史馮元欽所奏。甚屬紕繆。國家經理庶政。事貴持平。廷臣集議。自宜一秉公心。各屏偏私。然亦無取於一唱百和。諾諾唯唯。故即偶有參差。適昭公正。至於刑名案件。法司會議。更宜再三詳慎。公同參覈。以求情理之當。或所見不同。正不妨彼此商榷。歸於平允。閒有立意各殊。兩議具奏者。朕則擇其善者而從之。若有負氣相爭。立言失體者。朕必加以申飭。乃

馮元欽奏稱部臣剖白之言。近於詆訶。尚憶張照為
尚書時。於議稿中。有一二逞其筆鋒。迅利失當。過中
之語。朕曾訓誡之。近則無是也。至稱各持是非。竟成
水火。分門別戶。儼然敵讎。不可不防其弊。在馮元欽
之意。以為防微杜漸。而不知伊正蹈分門別戶之見。
故不覺輕出其口。將來若有黨同伐異之事。即自此
語開之也。馮元欽著嚴飭行。朕以廣開言路為心。故
寬待言官。以收進言之益。而伊等違忤朕之不加譴
責。漸無忌憚。試問近日臺諫諸臣。誠心獻替。有裨於
政治者幾人哉。朕留心察其隱微。一生積慮。總不出

名利二途。即偶有建白者。亦並非為國為民。思盡言官之責。不過博取虛譽。冀朕之賞識。加以升遷外用。多得養廉耳。即如謝濟世當日。於

皇考時竊慙直之名。及復為御史。則以養母為辭。懇請外用。甫到道員之任。即請加增養廉。操守耿介者。固如是乎。吳煒為御史時。曾以河務叅劾高斌。及朕用伊為口北道。伊畏首畏尾之意。甚覺卑鄙。朕諭之曰。高斌斷不存此意見。若存此意見。亦不成其為高斌矣。汝若因此與高斌抵牾。則過又在汝矣。莫謂高斌不能執法也。及朕今年巡幸宣化。召伊進見。因諭之。

曰。汝在任能受此荒涼否。謂其南人或不習邊地也。伊乃奏稱。臣每年有養廉二千兩。甚覺豐足矣。其志量乃不過沾沾於利祿耳。向之敢言。果出何心耶。李慎脩自負鯁直。不知者亦以是稱之。有人言其色厲而內往。其鯁直乃致飾於外。以為欺世盜名計耳。非真鯁直也。朕初不深信。及用為御史。其所陳奏。皆膠執不通之說。無一可見之施行。且有荒悖過甚者。朕降旨訓飭。宥其狂瞽。仍用為外道。以觀其後效。伊請訓之時。頓改為委靡巽順。以保全此監司之職。不復作謹直之象。設其鯁直性成。如古人之願留臺中。以

盡言職可也。是其志亦止在於溫飽。朕始信人言之不謬耳。昔司馬光論臺諫之官。其汲汲於名者。則深戒之。是沽名且大不可。况惟利是圖乎。彼三人頗負一時之名。而在傳人中。伊亦岸然自異。乃志趣鄙陋。若此。全不知聖人謀道不謀食之訓。何況其下焉者乎。爰因馮元欽之奏。頒發此旨。俾言路諸臣。各加儆惕。痛洗從前陋習。以副朕期望之意。○又

諭御史楊朝鼎前奏豫省盜案一事。朕已敕交廷議。今御史范廷楷痛斥楊朝鼎陳奏之非。且云豫省失盜。查乾隆七年共二十四案。八年止十九案。九年止五

案較之往年不為加多。奈何張大其事。議請重典。楊朝鼎即係協理河南道御史。忽然將無作有。聘此刻深之談。其意甚不可解。又云楊朝鼎請將盜犯之父兄伯叔等不同住址者一體治罪。自昔虞廷罰弗及嗣。周室罪人不孥。前史所載。楊朝鼎豈其未知而貿貿若是等語。范廷楷詞氣激切。幾於詈罵。夫御史互相標榜。一唱百和。暗結黨援。固為人心風俗之害。設各執意見以攻擊相尚。不顧國家政體。若相詈然。此風亦不可長。且楊朝鼎所奏現在交議。大臣等自有持平之論。如果所議准行。范廷楷據伊意見以為必

不可行。再行陳奏未通。亦未為不可。所謂拾遺補闕。自有其時也。今乃於甫經交議之際。急行參奏。負氣紛爭。為此過甚之語。誠鄙一桂從前所云不待部覆而抵拾浮翼。撓越漬陳者。朕早已降旨禁約。范廷楷獨不知之乎。至於請朕撤回原摺。毋庸交議。竟似國家政務。弗資六卿。皆伊等御史可以操其行止者。甚屬妄誕。著嚴飭行。

[illegible]